

四庫全書

集部

欽定四庫全書

集部

宋詩紀事卷五十八

詳校官監察御史臣李陽樾

侍讀臣孫球覆勘

總校官進士臣繆琪

校對官中書臣牛稔文

謄錄監生臣沈世攻

欽定四庫全書

宋詩紀事卷五十七

錢塘厲鶚撰

張栻

栻字敬夫廣漢人浚子以蔭補官孝宗朝歷左
司員外郎除祕閣修撰歷知江陵府荆湖北路
安撫使卒嘉定中謚曰宣從祀大成殿有南軒
集

謁陶唐帝廟詞

宋淳熙四年靜江守臣張某既新陶唐帝祠以二月
甲子率官屬祇謁祠下再拜稽首退而歌曰

溪交流兮谷幽山作屏兮曾丘木偃蹇兮枝相樛皇胡
為兮于此留藹冠佩兮充庭潔芳馨兮載陳純衣兮在
御東風吹兮物為春皇之仁兮其天四時序兮何言出
門兮四顧渺宇宙兮茫然

胡文定公碧泉書堂

在崇安縣籍溪

入門認碧溪循流識深源念我昔此來及今七寒暄人

事經幾變寒花故猶存堂堂武夷公道義世所尊永袖
霖雨手琴書貴立園當時經行地尚想笑語溫愛此亭
下水炯若玻璃盆晴看浪花湧靜見潛鱗翻朝昏遞日
月俯仰信乾坤因之發深感倚檻更無言

三月七日城南書院偶成

積雨欣始霽清和在茲時林葉既敷榮禽聲亦融怡鳴
泉永不窮湖風起淪漪西山卷餘雲逾覺秀色滋層林
叢綠間愛彼松柏姿青青初不改似與幽人期坐久還

起來隄邊足逶迤游魚傍我行野鶴向我飛敢忘昔賢志亦復詠而歸寄言山中友和我和平詩

朱子跋云久聞敬夫城南景物之勝常恨未得往游其間今讀此詩便覺風篁水月去人不遠

題榕溪閣

昔山谷南遷維舟榕下後人為作榕溪閣

寒溪澹容與老木枝相樛其誰合二美名此景物幽太史昔南驚於焉曾少休想當下榻時請與耳目謀品題信要領亦有翰墨留我來訪遺址密竹鳴鉤輶稍令舊觀復還與佳客遊樹影散香篆水光泛茶甌市聲不到

耳永日風颼颼所忻簿書隙有此足夷猶平生丘壑願
如痼不可瘳雖知等喧寂終覺靜裏優更思濯滄浪榕
根浮小舟

故太子詹事王公挽詩

十朋

大節元無玷中心本不欺排姦力扛鼎憂國鬢成絲方
喜三旌召俄興一鑑悲西風吹淚眼吾豈哭吾私

睿主龍飛日如公舊學臣忠言關國計清節映廷紳歲
月身多外江湖澤在民當年遺直歎千古更如新

題城南

曰璐按此首本集不載

城頭望西山秋意已如許雲影度江來霏霏半空雨

東渚

團團淩風桂宛在水之東月色穿林影卻下碧波中

麗澤

長哦伐木篇佇立以望子日暮飛鳥歸門前長春水

濯清亭

芙蓉豈不好濯濯清漣漪采去不盈把悵惆暮忘饑

西嶼

繫舟西岸邊幅巾自來去島嶼花木深蟬鳴不知處

采菱舟

散策下亭阿水清魚可數卻上采菱舟乘風過南浦

以上

南軒集

鶴林玉露云六詩平淡簡遠德人之言也

馬上口占

向來一雪壓霾昏曉跨征鞍傍水村七十二峯皆玉立

巍然更覺祝融尊

方廣寺睡覺

僧舍孤衾寄此情
莊生夢破梵鐘聲
浮漚蹤跡原無定
惆悵西風一夜清

十六日下山各賦二篇

存一

歸袂隨雲起
籃輿趁雪明
山僧可留客
世故卻關情
小倚枯藤杖
聊聽絕澗聲
如何山下客
一笑已來迎

以上
南岳

倡酬集

書花光墨梅

一枝已清妍交枝更媚嫵見之已愁絕那復隔烟雨錢
唐千頃春想見西津渡他日到南屏莫忘孤山意

題王介甫遊鍾山圖後

林影溪光靜自如蕭疎短鬢獨騎驢可能胷次都無事
擬向山中更著書

以上聲畫集

劉芮

芮字子駒東平人官永州決曹掾有順寧集

敬夫寄斜川詩敘往年之約殊不知今病矣非
如昔時獨心心不忘耳勉和一章以敘謝意

病著不任事淹臥心自休經時不出門況復斜川遊每
覲節物換恍驚時序流少年喜追逐聚散水上鷗沈舟
枯木畔風帆春樹立我病正爾許懷念老朋儔有酒不
能飲徒有獻與酬故人酌佳日亦復我念否佳章寫懷
抱一讀寬百憂吾君念遠民歸計未易求

式古堂書考

薛季宣

季宣字士龍永嘉人起荆南帥辟書薦為大理

寺主簿歷大理正出知常州有浪語集

遊竹陵善權洞

萬古英臺面雲泉響佩環練衣歸洞府

湖水倒流入水洞中

香雨

落人間蜨舞疑山魄花開想玉顏幾如禪觀適遊鮒獻

澄灣

寺故祝英臺宅唐昭義帥李蟪嘗見白龍出水洞而為雷雨今小水洞存鱧魚四足

左右蝸蠻戰晨昏燕蝠爭九星寧曲照三洞獨何營世

事嗟興喪人情見死生阿誰能種玉還爾石田耕

山有三洞

九斗壇故更寺觀者不一再有李後主斷還僧寺批札
石記語極可笑大水洞有石田數十町奇絕

觀岳侯石像

萬死何如獄吏尊威名蓋世古難存二桃豈是功高賜
一舸不容身退論幾為飲江思道濟謬因圖像削王敦
沈碑千古蛟川恨留與無窮客斷魂

以上浪語集

王彥和

彥和崇德人

題扇

天邊一線征鴻沒山色淺深墨未勻別浦漁舟待歸去
夕陽渡口兩三人

嘉興府志彥和書此于中貴人扇上光堯見之
稱賞令盡進所作賜金帛

游次公

次公字子明建安人號西池定夫諸孫禮部侍
郎操之子范石湖帥桂林日參內幕有唱酬詩

卷

漁父

竹裏茅茨竹外溪
粼粼白日護漁磯
想應日日來垂釣

石上蓑衣不帶歸

詩人玉屑

畫虎圖

平生射虎裴將軍
馬蹕如龍弓百鈞
手撚白羽旁無人
注虎使虎不敢奔
須臾叢薄爛斑出
人馬不知俱辟易
矢如蓬蒿弓減力
將軍得歸幾敗績
徐行爪牙無不露
眈眈垂頭若微顧
尾翦霜風林葉飛
倏忽山頭日光暮
包家畫出真於菟
我尚不敢編其鬚
昔人作詩譏畫圖

吁嗟畫圖今亦無

合璧事類別集

耒陽道中

山頭磴石危梯險
山下荒田野草悲
更著秋風吹兩鬢
不消幾日盡成絲

詩家巧鬻

潘時

時字德廊良貴之兄子
李莊簡光之壻也
孝宗朝官至尚書左司郎中

嚴先生祠

古屋巔巖上荒祠落葉中乞靈無俗駕垂世有高風鳥
語谷相谷魚游溪若空徘徊欲忘去船背夕陽紅

鈞臺集

張鎡

鎡字功甫號約齋西秦人居臨安循王諸孫官

奉議郎直祕閣有南湖集

誠齋詩話功甫詩斷橋斜取路古寺未闢門絕
似晚唐人詠金林檎花云梨花風骨杏花妝寫
物之工如此子歸自金陵功父送末章云何時
重來桂隱軒為我醉倒春風前看人喚作詩中
仙看人喚作飲中仙此詩超然矣

楊誠齋贊功甫像云香火齋被伊蒲文物一何
佛也襟帶詩書步武瑤琚又何儒也門有朱履
坐有桃李一何佳公子也冰茹雪食凋碎月魄
又何窮詩客也約齋子方內歟方外歟風流歟
窮愁歟老夫不知君其問之白鷗

謝李仁父送茯苓

岷峨山中千歲松枝蚪幹直摩青空雪霜剝落中不槁
膏液下與靈泉通龜跼蹐伏自磊砢金堅玉凍仍豐融
篝燈夜取喜得雋煮鼎朝聽如吟風杵成坐上香霏雪
更和乳酪收全功當知至味本無味子若服之壽無窮

巽巖眷梁硬如鐵冠義切雲佩明月百好都隨春夢空
大業獨傳鴻寶訣中宵咀嚼不搖頭玉池生肥咽不輟
憐我百慮形早衰裏贈扶持意何切丹砂著根謾爾傳
脂澤釀黍計已拙由來妙道初不煩此法莫從兒輩說
徑思舉袂揖浮立下視塵世真一決朱顏留得亦何為
追逐同堅歲寒節

全芳備祖

游九鎖山

九鎖非凡境烟雲路不分山寒長帶雨洞古不收雲夜

宿聽林鶴晨炊摘野芹黃冠皆好事添炷石爐熏

涼蟬亂叫朝暮雨獨鶴不迷前後山芎葉煮湯勝茗椀

栗花然火照松關

洞霄詩集

釣臺

絳衣騎日扶桑上三精九縣開靈貺趙梁雍代跡俱空
馮吳寇鄧勲相望客星何處潛光芒雙臺疊巘摩穹蒼
釣絲千丈捲烟雨俯瞰一碧玻璃江羊裘坐穩無心動
蒲輪纁幣知何用故人聊爲小周旋君房謬欲相推送

寥寥歲月今幾秋山寒松吹多颼颼春來日暖花氣發
極浦浪轉魚龍遊先生有臺人共高虛庭忍見生蓬蒿
斷碑敗壁蠹荒蘚灌木野鳥捐枯巢一朝鐘梵交雲際
簷楹改觀輝杉桂非關好事取時名此中恥但稱能吏
卻經祠下羅清樽試歌此詩當招魂先生出兮佩蘭蓀
明璣耀旗駕瑤瑤黃麟道前翠虬奔先生去兮山雲屯
玉妃金童從繽紛吹簫鼓瑟聲冥冥目斷暮靄棲遙林

宿吳江塔院

宿雲蔽空溪冥濛我船曉繫紅蓼叢破程約涉一舍外
遠目未快千山供岸旁小店換馬去羶裘障冷披蒙茸
須臾巾蓋不容展莽莽暗霧逢逢風偕行客輿屢掀簸
適值官騎來憧憧弓刀負帶競硃矸驢駟騶馱駟
爭前迭進步殊窘迫暮始望橋垂虹石塘百丈捍駭浪
間有灘磧紛漁筒鴉群黑白混鷗起颿影亂點還波中
筆牀茶竈住此地得句未必慚龜蒙浮圖老屋且投宿

解檐正聽黃昏鐘
紗籠炙燈照佛古
蘭席布榻便吾慵
恍驚足履未游地
逸興恐失難重逢
案邊紙盡莫翻寫
不覺紅日看生東

百城烟水

句

燕子初歸曾識面
牡丹未放已知名

桐江續集

一櫂徑穿花

十里滿城無此好風光

玉照堂觀梅

曾覲

覲字純甫號海野
老農汴人紹興中
以寄班祇

候與龍大淵同為建王內知客孝宗受禪以潛
邸舊人除權知閣門事淳熙中除開府儀同三
司加少保醴泉觀使

老學菴筆記曾覲字純甫偶歸正官蕭鷓巴來
謁既退復一客至其所狎也因問曰蕭鷓巴可
對何人客曰正可對曾鷓脯覲以為媿已大怒
與之絕

玉環山

在太平縣西南楚門港中原名木榴山避
錢王諱改焉

天寶風塵暗兩京禍從妃子笑中生玉環兩字真堪惜
好與青山改別名

台州府志

題楊補之雪梅卷

筆端造化出天巧寫出江南雪壓枝誰道春歸無覓處

橫斜全似越溪時

式古堂畫考

龍大淵

大淵紹興中與曾覲同爲建王內知客孝宗受
禪自左武大夫除樞密副都承旨知閣門事出
爲江東總管

齊東野語思陵妙悟八法留神古雅當干戈倂
擾之際訪求法書名畫不遺餘力又于椎場購

北方遺失之物故紹興內府所藏不減宣政惜
乎鑒定諸人如曹勛龍大淵張儉鄭藻平琰黃
覓魏茂實任原等人品不高目力苦短凡經前
輩品題者盡皆拆去故今御府所藏多無題識
其源委授受歲月考訂邈不可求為可恨耳

遊九鎖

峯巒九鎖路縈盤翠色霑衣作晚寒日暮神仙歸洞府
雨餘星斗下天壇人生何用千鍾貴老去須求一室安
會得谷神元不死世間何事可相干

洞霄詩集

彭九萬

九萬字好古崇安人淳熙閒國學立禮齋長

凌波辭

歲芳兮婉冉悲江空兮蘭柁歸人嬋媛兮胡來遲憺風
魂兮佩誰思素衣兮儼黃裏玉襦兮蒙翠被明波淙淙兮
渺愁予含香懷春兮中心苦昔遺襟兮今契闊佇佳期
兮宵脩絕幻塵緣兮寥中憂時既晏兮不可留汎雲輶
兮水裔紉予瑟兮難理人奚歸兮路蒼茫湘有臯兮春

綠起

萬姓統譜

楊炎正

炎正字濟翁廬陵人

鶚按炎正工詞有西樵語業一卷毛氏汲古閣刊本

誤作楊炎號止濟翁予見舊鈔本作楊炎正濟翁是炎正其名濟翁其字也今考武林舊事有

楊炎正詩全芳備祖有楊濟翁詩即是一人毛氏之誤可見矣

錢唐迎酒歌

錢唐妓女顏如玉一一紅妝新結束問渠結束何所爲
八月皇都酒新熟酒新熟浮蛆香十三庫中誰最強臨
安大尹索酒嘗舊有故事須迎將翠翹金鳳烏雲髻彫

鞍玉勒三千騎金鞭爭道萬人看香塵冉冉沙河市琉璃杯深琥珀濃新翻曲調聲摩空使君一笑賜金帛今年酒賽真珠紅畫樓突兀臨官道處處繡旗誇酒好五陵年少事豪華一斗十千誰復校黃公壚下謾徜徉何曾見此大隄倡惜無顏公三十萬往醉金釵十二行

武林舊事行都官酒庫每歲清明前開煮中秋前賣新先期諸庫呈樣點檢所以呈府既中擇日開沽以白布三文餘揭竹竿頂題曰某庫選到酒匠某人醞造上等釀辣無比高酒三五人扶之而行以鼓樂妓女雜技前導聯鑲穿市觀者如堵酒匠則紫衣新巾乘馬從之以府中

所賞綵帛錢會銀梳狀負馬前謂之迎酒楊炎
正詩云云

桂花

翠園侍女擁紅幢霞臉調朱笑額黃共醉東君千日酒
更翻西母九霞觴人間天上高低影月下風前自在香
輸與廣寒宮裏客年年綠鬢賞秋光

全芳備祖

蘧老寄龍涎香

瘴海驪龍供素沫蠻村茉莉挹清滋微參鼻觀猶疑似
全在爐烟未發時

翰墨大全

龐謙孺

謙孺字佑甫籍之曾孫南渡居吳興有白蘋集

奉使過汴京作

蒼龍觀闕東風外黃道星辰北斗邊月照九衢平似水

胡兒吹笛內門前

詩人玉屑

郊居九日

樹夾門方正谿侵岸欲隤水搖雲影動風抑鳥聲回籬

缺舟常過底空客不來故人經歲月又見菊花開

前賢
小集

拾遺

時瀾

瀾號南堂從學呂成公之門

從先生明哲道中呈伯廣炳道

燕子楊花各自飛
雨乾溪路綠初肥
無人會得風雲意

可是千年瑟竟希

濂洛風雅

王子俊

子俊字才臣號格齋廬陵人周益公楊誠齋之

客以薦官成都帥幕有三松集

代漕使讌賀帥平蠻轉官樂語

紫橐仙人雲錦裳
碧油幢下受降羌
三邊外掃烟塵靜
一札中含雨露香
天上卽歸扶日轂
尊前莫惜醉霞觴
主賓情分今如許
飲罷相攜入帝鄉

三松集

賀彥澤新得子

君不見白居易五十八歲方得嗣
當時立名曰阿崔
香綳繡襦胎髮膩
又不見元微之五十八歲方生兒
當時

立名曰道保可望成家得力時西鄰有親曰彥澤天與
明珠堪愛惜今年年方四十三甲庚少似唐元白葛仙
溪前燕子樓燕子未老人風流一年一度作湯餅但願
年年逢麥秋

翰墨大全

句

大兒阻飢頗廢書小兒忍寒粟生膚婦縱有禪無一襦
不敢緣此相庸奴

題貧樂圖和徐思叔韻

來梓

梓字子儀

四朝聞見錄來子儀與周洪道實布衣交洪道為樞使子儀入都訪洪道館于嘉會門外表忠觀置酒極歡示以近詩子儀盡卷笑曰周樞使詩也非周洪道詩也洪道問所以子儀曰昔徐師川少工詩晚為樞府詩寔不逮昔人以為向來徐師川詩後自是徐樞使詩洪道笑而容之

子猷訪戴圖

四山搖玉夜光浮一舸玻璃凝不流若使過門相見了
千年風致一時休

杜甫遊春

典盡春衣不冝歸熊兒扶道灤溪西傷時懷抱深于海

掠眼風光醉似泥

以上前賢小集拾遺

沈約之

挽張于湖

氣概凌雲孰敢先中興事業冠英躔朝廷議論一言定
翰墨風流四海傳恰跨鰲頭升紫闥忽騎箕尾上青天

竹林笑傲今陳迹撫櫬江臯涕泣然

錦繡萬花谷

施士衡

士衡字德求湖州人嘗為宣州簽幕有同庵集

挽張于湖

十年帥鉞倦馳驅適意方謀一壑居賈誼有才終太傅
薛收無壽處中書傷心風月江山在過隙光陰夢幻虛
紅紫飄零春色盡後凋松柏獨蕭疎

錦繡萬

姜特立

特立字邦傑麗水人靖康中父綬死難補承信
郎孝宗召為太子春坊光宗即位除知閤門事

累官浙東馬步軍副總管慶遠軍節度使有梅
山橐續橐

和陸放翁見寄

遙知三徑長荒苔解組東歸亦快哉
津岸紛紛羣吏去
船頭衮衮好山來
平時佳客應相過
勝日清尊想屢開
若許詩篇數還往
直須共挽古風回

和陸郎中放翁

午庭風雨撼高槐
一洗城頭十丈埃
老子坐間尋句好

故人門外寄詩來勁鋒久服穿楊妙鈍思深慚擊鉢催
清佩左符君未可要聽吟思發春雷

寄汪尚書

大猷

五十年間歎闊疎相忘兩地復江湖書來筆底驚強健
詩去吟邊想步趨好對青山看歌舞莫嫌紅粉笑髭鬚
鳳毛已有哦松韻尚記金華舊範模

冬夜不寐

宵柝迢迢警睡魔靜思甘分老林坡忍胞向有嵇康嬾

扣角曾無甯戚歌不起妄心思世事祇將閒意養天和
時人休說長生術學著長生事轉多

李仲永墨梅

寫竹如草書患俗不患清畫梅如相馬以骨不以形墨
君曩有文夫子蟬腹蛇跗具生意當時一派屬蘓公雨
葉風枝畧相似花光道人執天機信手掃出孤山姿陳
元幻卻西施面此妙俗人那能知近時賞愛楊補之補
之嫵媚不足奇李生于梅卻有得高處自與前人敵倒

暈疎花出苦心暝雲暗谷藏春色我一見之三歎息意
足不暇形模索君若欲求之點畫胡不去看江頭千樹
白

漁舍新成

旋規漁舍傍溪山山轉溪迴翠竹間閒看羽觴行詰曲
戲拈竿線弄潺湲浮家不入分風浦歸棹休尋落照灣
漫說五湖烟浪好幾人險處得心閒

以上梅山續集

方孝能

孝能福州司理

福唐元夕

街頭如畫火山紅
酒面生鱗錦障風
佳客醉醒春色裏
新妝歌舞月明中

薄薄春衫新縷金
樽前風細怯輕陰
酒香隱約生紅粉
正與桃花共淺深

燈外風搖沽酒旆
月中人數買花錢
少年心緒如飛絮
爭逐遺香拾墜鈿

淳熙三山志

張履信

履信字思順號遊初都陽人侍郎南仲之子嘗
監京口鎮官至連江守

飛來峯

飛來何處峯木杪夜千尺愁猿喚不應月色同一白

冷泉亭

水石一闌干僧歸四山靜攜琴譜澗泉月浸夜深冷

翠微亭

朝朝烏北出夜夜烏南歸所謀在一食所息在一枝人
生竟何得與烏同此機身世忽過慮泉石良自怡月上
飛來峯更誰登翠微

以上咸淳臨安志

訪丹陽玉乳泉已變昏黑因賦詩

淳熙十三年

觀音寺裏泉經品今日唯存玉乳名定是年來無陸子
甘香收入柳枝餅

游宦紀聞

徐逸

逸字無競號抱獨子天台人

仇遠稗史徐抱獨少與朱文公爲友公提舉浙東日過其家然燈夜話至鐘鳴而別公嘗托無競作謝恩表書云可放筆力稍低使人見之無假手之議也其推獎如此

晝眠治平寺

在西湖北山

頻年游覽不暫寘野艇往來無水程雨休最好是鷗浴
風靜更清聞鶴聲酒家新熟欠前債僧榻借眠餘宿醒
崧高泰華未挂眼鬢影蕭颯難爲情

咸淳臨安志

孤山

咸平處士風流遠招得梅花枝上魂疎影暗香如昨日

不知人世幾黃昏

全芳備祖

蔡開

開字子明崇德人淳熙間進士官至漕憲弟闕
字子正慶元閒進士官至國子祭酒

題資福院平綠軒

瞰水地仍敞開窗望不迷良疇連遠近秀野混高低
曉起烟千樹春耕雨一犁道人深樂此壞衲且幽棲

至元嘉禾志觀音資福院在崇德院西南一里
西廡有軒瞰流扁平綠陳炳退菴蔡開畏齋武

林莫若拙輔廣潛齋王用亨釣臺江表祖張拱
敬齋長樂王益祥南豐曾揆苔水莫柯陸德輿
魯齋皆有詩

李安期

安期字泰伯邵武人以詩游江湖間一日謁四
川茶馬使王淮淮將以賢良薦因奕爭道遂拂
衣而去

賦白鷺

漁父家風不設罾錦鱗為飯水為羹銀袍祗當蓑衣著

自在江湖過一生

邵武府志

盧 蹈

蹈字衷父青社人寓犍為郡夾江縣佳士也

絕句

客懷耿耿自難寬
老傍京塵更鮮歡
遠夢已回窗不曉
杏花同度五更寒

放翁題跋

應 廓

廊閩縣令

七夕

烏鵲成橋架碧空
人間天上此歡同
仙查逐浪浮銀漢
青鳥傳音到帝宮
牛女佳期情不斷
古今遺恨意難窮
綵樓乞巧知多少
直至更闌漏欲終

淳熙三山志

王佐才

佐才字呂輔崇安人少游邑庠范汝為叛總義
兵禦賊建陽以功補承信郎後為吉州水軍統
領與賊魁殊死戰中流舟壞而沒吉人廟祀之

荅秦兵部求墨竹

夜到茅亭近竹籬
影隨寒月下苔墀
吟餘未嬾蕭疎興
曾寫離披一兩枝

贈徐子虛畫魚

我嘗放意游江湖
喜從釣叟觀真魚
有時臨溪行復坐
秋水無風魚自如
鮮鱗滑鬣隨上下
回旋戲躍形皆殊
兩兩相逢若對語
聚頭戢戢搖雙鬚
忽然散漫背游去
一半掉尾潛菰蒲
往來得所弄晴色
員波觸動生浮珠
困

依垂楊看不足盡日忘歸誰與俱自從北走塵土窟十
年不復瞻尊鱸憑誰畫出江湖趣東海今聞徐子虛毫
端奪得生時意京師好事爭傳摹寫成雙幅輒遺我展
舒活動驚堂隅窮搜前古少奇筆此本祇恐人間無任
教涸轍強濡沫對面相忘千里書

以上聲畫集

陳國材

國材廬陵人

句

紅日晚天三四雁碧波春水一雙鷗

鶴林玉露云周益公楊誠齋咸稱之

周 邨

邨吳江縣尉見陸游入蜀記

三高亭懷范石湖

尊脆鱸肥酒細傾浩歌悲壯欲誰聽沈迷簿領頭將白
彈壓江山眼自青魚躍紫鱗衝葦岸鷗翻白雪下沙汀
西風散髮危亭上醉倚豐碑照日星

百城煙水

邵經國

經國永嘉人

上樓參政

聞道先生欲桂冠先生幾日出長安去時莫待淋頭雨
歸日須防徹骨寒已遂平生多少志莫令末路去留難
二疏畢竟成何事留取他年作畫看

吹鈿錄樓攻媿既參大政屢欲丐閑至繪二疏
以見意邵經國作詩云云

傅大詢

大詢字公謀宜春人

鶴林玉露傳公謀尤工作酸文嘗作無遮榜語
云紅旗渡口淒涼芳草夕陽天白紙山頭慘淡
落花寒食節

賀雨

為分宜宰許及之作

獅子關前半篆烟二龍飛下卓篙泉銀河掣電連宵雨
綠野翻雲四月天便覺春生花一縣會看秋熟米三錢
何時卓魯登黃閣都與寰區作有年

袁州府志

劉鄂

鄂字國相

讀許右丞

翰

所作陳少陽先生哀詞

并州更作桑乾客道逢舍者來爭席掀髯對坐有鉅人
開口劇談如舊識試問客子從何方興言扼腕微有傷
吾祖昔遑邳緯計屢以直論干君王讒諛弄國賢者避
禍福相乘呼吸異懸知必有代庖責被髮纓冠赴東市
大明既爭日月光真與天地同久長嗟予之生後長者
卻識前輩奚其詳大臣罔上擅行戮揚以浮言蓋私曲

誅姦發德示後世右丞之文端可復中興名門凡幾門
聖朝報稱非少恩芄蘭袖出承命帖猶幸及識公之孫
春秋愛賢許之宥十世已往未為厚況今公議方大明
叩天大叫君無後故人夢想規大賢仰止高山思執鞭
典刑方及見故物倏爾長別良依然土田未足為君勸官
爵未足酬君願行矣志意勿倦遊歸而視之有家傳

忠盡

錄附

楊輔世

輔世字昌英廬陵人誠齋之族

南溪

碧玉寒塘瑩不流
紅蕖影裏立沙鷗
便教不作南溪看
當得西湖十里秋

詩人玉屑

游開

開字子蒙建安人定夫從孫

和劉叔通

昨夜劉郎叩角歌
朔雲寒雪滿山阿
文章無用乃如此

富貴不來爭奈何
邴鄭向嘗依北海
晁張今復事東坡
吹噓合有飛騰便
未用溪頭買釣蓑

朱子語類云詩須不費力方好此等詩使蘓黃見之定當賞音

丁世昌

世昌字少明號竹坡黃巖人

次虞仲房司馬送秋韻

自入秋光能幾時
無端又賦別秋詩
夜長月冷蟲鳴急
天闊風高雁過遲
三徑黃花存舊節
半欄紅葉墮殘枝

往來畢竟乘除法何用年年宋玉悲

黃巖英氣

聞人滋

滋字茂德嘉興人嘗為勅局刪定官

陸游老學菴筆記嘉興聞人茂德老儒也喜留客食不過蔬豆而已郡人求館客者多就謀之多蓄書喜借人自言作門客牙充書籍行聞豆腐羹店子少時嘗與之同在勅局為刪定官談經義衮衮不倦發明尤多尤邃於小學云

早秋游靈巖

凭闌山翠溼濛濛佛閣依然水殿風欲採蓮花何處所

年年金井落梧桐

鵲李詩警

王用亨

用亨字子安自開封徙崇德淳熙閒進士分教

襄陽

平綠軒

在資福院

禪窗虛敞瞰西南野色溪光接畫簷雲去碧天無間斷

一眉依約見山尖

鵲李詩警

宋詩紀事卷五十七

欽定四庫全書

宋詩紀事卷五十八

錢塘厲鶚撰

劉宰

宰字平國金壇人紹熙元年進士調江寧尉真
州司法寧宗朝韓侂胄枋國不復仕自號漫塘
病叟寶慶初除將作少監進直敷文閣知寧國
府不拜卒諡文清有漫塘集

北固山望揚州懷古

北固城高萬象秋煙竿一縷認揚州試乘綠漲三篙水
要見珠簾十里樓淚溼宮衣朝霧重愁薰寒草夕陽浮
隋隄舊事無人問兩兩垂楊繫客舟

秋懷

一抹紅綃日腳霞千林暮靄納歸鴉西風捲盡梧桐葉
乞與中庭散月華

雲邊阻雨

薔薇籬落送春闌筍甚園林早夏閒牛背牧兒酣午夢

不知風雨過前山

以上漫塘集

張嗣古

嗣古宜春人紹熙元年進士歷起居舍人中奉
大夫直龍圖閣

仰山龍湫

崎嶇鳥道開烟蘿長空偃蹇聲蕩摩白龍怒吼挂絕壁
蒼兕離立迎清波枯竹挂破青苔色雷雨收功神斂迹
窮源不得空歸來掬雪搏珠三歎息

登妙高亭

雨餘山石洗孱顏臥虎蹲羊各自閒杖屨貪穿秋色好
不知衣惹蘚痕斑

以上袁州府志

聶子述

子述字善之建昌軍南城人紹熙元年進士嘉
定中四川制置使曾以顯謨閣學士使金卒謚
文定

曾公道夫出示先世手澤斂衽拜觀之餘敬題二

小詩

嘉定壬午下元日

香瓣平生滿意熏更參曲阜問關津
祇宜黃閣官尊貴不敢近前丞相嗔

一門翰墨森圭壁諸老題評粲錦花
珍重雲仍好收拾夜虹貫月定君家

鐵網珊瑚

李 璫

璫字季永燾次子紹熙元年進士理宗朝歷官
同知樞密事四川宣撫使有悅齋集

離巫山晚泊棹石灘下

黃昏風雨阻江濱
翠綰羣峯暮色勻
一夜子規啼到曉
孤舟愁殺未歸人

上已從史巫山祓飲江臯

風沙一夕卷冥冥
曉色瞳矇上翠屏
薄宦驅人成老大
佳時得酒慰飄零
紅餘晚樹迷幽谷
綠漲晴波失遠汀
卻是崇山兼峻嶺
看來渾不減蘭亭

以上全蜀藝文志

詹義

義都昌人紹熙元年進士

登科後解嘲

讀盡詩書五六擔老來方得一青衫佳人問我年多少

五十年前二十三

清夜錄

詹義

遊武夷

石廩巖前繫小舟娟娟明月照清秋仙人一夜吹長笛

三十六峯雲盡收

武夷詩集

滕岑

岑字元秀嚴州建德人紹興乙卯領鄉薦屢上
南宮不第紹熙元年庚戌特奏名仕為温州平
陽縣丞有無所可用集

方萬里序回至郡讀釣臺集見有曰月色搖江
如永走又有所謂七里風煙萬里寬者心異之
細視則郡人龍嶺老樵滕公作也

嚴州府志元秀平生苦吟與陳頊相倡和佳處
自謂高視大歷十才子詩凡三千首趙汝匯知
郡日借其集不還故傳者甚少大抵皆江西體
也後宋景濂序睦州詩派岑實與焉

秋晚

槭槭霜風勁
駸駸物象雕
屢遷憐蟋蟀
一敗笑芭蕉
林葉疎逾響
山雲薄易消
雖無遠行役
對此亦何聊

瀛奎律髓

句

斷橋測水露半影
野渡攲泥留亂痕

拄杖送僧

鄭興裔

興裔字光錫
顯肅皇后外戚也
紹熙初知揚州

瓊花

春晚驅車到古祠看花復誦舊題詩少年嘗記六七月
大暑曾開三五枝醉酒輒來思往事凭闌欲去立多時
八仙髣髴休疑似相隔仙凡只一絲

瓊花譜

董道輔

道輔武陵人于湖張孝祥門人

紹熙庚戌中秋後三日拜于湖先生墓

曉出白下門瘦馬踏秋色鍾山度蒼翠慰我遠游客暮
投清果寺花草獻幽寂長廊靜無人落日照東壁平生

張于湖萬里去一息翩然九州外汗漫跨鯨脊乾坤能
幾時安用較顏跖文章失津梁所念斯道厄夜闌耿不
寐搔首聽蕭瑟懷人感西風翁仲守孤柏

景定建康志

張 沔

沔字聲父吳興人紹熙二年發解

詠苔梅

老龍全身著艾蒔不耐久蟄潛拏空爪頭撥動陽春信
香在霜痕雪點中

題黃巖酒肆

東風吹雨水平沙下卻籃輿訪酒家行役不知春早晚

牆頭紅杏欲飛花

以上梅礪詩話

歐陽謙之

謙之字希遜廬陵人學于朱子

題睢陽五老圖

款題紹熙壬子

厚德良多積善根賢才他日在兒孫當知相里非凡壻
豈有陳平久席門五老繪圖千載譽群公詩禮百年存

憑君挾取傳家學青史賢良有後昆

鐵網珊瑚

韓 槲

槲斲王世忠孫紹熙初官直祕閣知真州

游洞霄宮

雲去山空鶴自來天壇石室已蒼苔洞前石鼓叩即應
巖上仙真挽不回明月照人山霧合東風吹澗野蘭開
高眠百尺長松下閑看飛花落酒杯

洞霄詩集

韓 松

松挺弟

游棲真洞

黃冠具竹輿邀我游棲真山家雜水樹野徑橫荆榛長
松臥蒼蛟亂石錯紫鱗委曲至洞府積雪開雙門結頂
寶蓋高下可容百人神仙獨何之碁局今猶存翠子拂
不落衣袖生清芬山門局未終浮世三千春安得從之
游一笑凌層雲

洞霄詩集

陸淞

淞字子逸號雲溪山陰人官辰州守放翁雁行也

者舊蹟聞陸辰州子逸左丞佃之孫晚以疾廢卜築于秀野越之佳山水也放傲世間不復有營念對客則終日清談不倦尤好語前輩事

鄉校頌并序

鄉校海鹽縣大夫能教育人材而成之也

維鄉有校示民有知教始豫遜迪于訓彝維風化是裨維校在鄉示民有防入孝出悌為忠為良斯邦家之光

鄉校有基如德弗虧劉侯遷之魏侯新之李侯能成之
其遷者初其新者中肄業傳道有師有宗繫李侯之功
樂只君子孰後孰先顯有嘉聞於斯萬年維大夫之賢

鄉校五章章五句

海鹽縣圖經李直養字無害維揚人正民之孫
紹熙中為海鹽令興學校修大成殿置書籍祭
器兼設小學擇師教之陸淞有詩

陳亮

亮字同父婺州永康人淳熙中詣闕上書光宗

紹熙四年策進士擢第一授簽書建康府判官

廳公事未至而卒端平初謚文毅有龍川集

及第謝恩和御製詩韻

雲漢昭回倬錦章
爛然衣被九天光
已將德雨平分布
更把仁風與奉揚
治道修明當正宁
皇威震疊到遐方
復讐自是平生志
勿謂儒臣鬢髮蒼

龍川集

梅花

疎枝橫玉瘦
小萼點珠光
一朵忽先變
百花皆後香
欲

傳春信息不怕雪埋藏玉笛休三弄東君正主張

全芳
備祖

崔與之

崔之字正子廣州增城人紹熙四年進士理宗
朝累除廣東安撫使拜參知政事右丞相致仕
卒累封南海郡開國公謚清獻有菊坡集

送夔門丁帥赴召

議論方前席功名早上坡去帆瓜蔓水遺愛竹枝歌同
志星辰少孤愁暮雨多倚風窮望眼碧色渺平莎

峽山飛來寺

萬里星槎海上旋，名山今喜得攀緣。
猿揮孫恪千年淚，月照維摩半夜禪。
磴長荒苔人跡少，厓攢古樹鵲巢懸。
江流上溯曹溪水，時送鐘聲到洞前。

以上菊坡集

孫伯溫

伯溫字南叟，豐城人。紹熙四年進士，知臨湘縣。
游麻姑山瀑布泉。

九官守不嚴，失卻兩玉龍。塵世著不得，忽來此山中。雷

電白日間冰雪詩人胸天公不汝尤為人作年豐

娛書堂詩話麻姑山瀑布分作兩派而下灌溉甚廣豐城孫南叟嘗賦古風云云甚有西江體

馮多福

多福常州人紹熙四年進士寶慶中以直寶謨

閣出守鎮江

鶴林寺

春郊躬勸相稅駕擬禪關院古深藏竹堂虛淨對山日

曛農父醉雲伴老僧閑暇日還攜茗同來淪虎斑

鶴林寺志

喬行簡

行簡字壽朋婺州東陽人紹熙四年進士理宗
朝拜左丞相平章軍國事封肅國公及請老加
少保保寧軍節度使醴泉觀使封魯國公卒贈
太師謚文惠有孔山集

池荷

萱草軒窗處處幽酒中不著客中愁芭蕉葉上無多雨

分與池荷一半秋

全芳備祖

游三丘山

在東陽縣南晉義熙間殷仲文為東陽守嘗登此山後人思之若襄陽之羊祜

故又名峴山

疑是乘風到九天不知身在此山巔
萬家攢簇炊煙底一水縈紆去鳥邊
便覺塵緣輕似羽何妨詩思湧如泉
停杯更待林梢月歸去家僮想未眠

東陽縣志

程 琬

琬字懷古休寧人先世本洺州自號洺水遺民
紹熙四年進士理宗朝累官禮部尚書翰林學

士知制誥歷端明殿學士致仕卒贈少師有谥

水集

流觴西湖用范左史韻

畫船同載若登仙
卻笑泥韉馬不前
要識冷烟催穀雨
須知澹日養花天
千條翠柳隨風舞
一樹夭桃照水妍
始信人生行樂耳
虛名那用世間傳

出南郊清甚

春風吹展到南園
著酒塗酥花正繁
更喜滿前無俗物

橫塘疎竹渭南村

以上洛水集

句

黃麻芳草罷紅藥正花翻

省試紅藥當階
翻詩吹劍錄

許景迂

景迂舊名閼山陰人紹熙癸丑進士有野雪吟

橐

詠虞美人草

合歡枝葉想腰身不共長安草木春若聽楚歌能楚舞

未央空有戚夫人

全芳脩祖

詠茭

翠葉森森劍有棱
柔條鬆甚比輕冰
江湖若借秋風便

好與蓴鱸伴季鷹

蘇州府志

句

野店青窺戶
春船綠漲篙

梅磴詩話

周燁

燁字昭禮
邦之子樞密麟之之族姪南渡寓居

臨安府之清波門著清波雜誌

曰琯按今刊本清波雜誌作碑

舊本有紹熙四年張貴謨序書中俱作碑宜從之

句

捲簾試約東君問花信風來第幾番

春詞

清波雜誌

尹德鄰

德鄰字直卿永豐人紹熙中太學生

問寢龍樓曉

父母人皆有儀刑自冕旒問安趨燕寢拂曉過龍樓鶴

駕嚴晨衛雞人徹夜籌慈闈天語接飛棟月華收萬姓
齊歌舞三宮款獻酬小儒憂國切幾白九分頭

鶴林玉露光宗以疾不能過宮德鄰初參太學
簾引詩題出問寢龍樓曉詩成學官擊節人皆
傳誦

周震

震紹熙中知泉州惠安縣

春月勸農至華林寺

飛廉怒見海天明十里籃輿出勸耕隴麥低頭須雨意

林花仰面笑春晴
熙寮連轡勤因事
父老傳杯識至情
及物無功慚竊廩
豐年有願是忠誠

泉州府志

馮 椅

椅字奇之都昌人
紹熙四年進士充
江西運司幹辦公
事攝上高令

詠歸亭

在筠州上高縣

弓轉寒溪月一灣
下臨虎豹踞欄斑
林烟濶處飛層閣
雲影窮頭護遠山
衿佩光陰弦誦裏
丹青人物畫圖閒

紅塵堆案那能到只有漁船自往還

瑞州府志

俞灝

灝字商卿世居杭紹熙四年進士歷麾節皆有
聲實慶二年致仕築室九里松自號青松居士
有集

武康道中

竹窗聽雨自安眠不道驚湍近屋前
省得去年桃葉渡水痕祇到樹旁邊

前賢小集拾遺

湖隄晚行

暝色俄從草色生，管弦羅綺盡歸城。
不應閑却孤山路。

我自扶藜月下行。

咸淳臨安志

孫惟信

惟信字季蕃，號花翁，開封人。居婺州。光宗時棄

官隱西湖有集。

文獻通考陳氏曰：花翁在江湖頗有標致，多見前輩多聞舊事，善雅談，長短句尤工。

劉後村花翁墓誌：季蕃貫開封，少受祖澤調，監當不樂棄去，始昏于婺，後去婺游留蘓杭最久。

一榻之外無長物躬饜而食書無乞米之帖文
無逐貧之賦終其身如此名重江浙公卿間聞
花翁至爭倒屣所談非山水風月一不挂口長
身緼袍意度踈曠見者疑為俠客異人其倚聲
度曲公瑾之妙散髮橫笛野王之逸奮袖起舞
越石之壯也

賦女冠還俗

疊卻霞綃上醺衣女童髻髻綠楊垂重調螺黛為眉淺
再試弓鞵舉步遲紫府烟花鶯喚醒丹房雲雨鶴通知
簾低紅杏春風暖清夢應曾見舊師

詩人玉屑

垂絲海棠

娟娟垂絲不自持更禁日炙與風吹
仙家見慣渾閒事
乞與人間看一枝

後村千家詩

禪寂之所有賣花聲出廊廡間清婉動耳

曲巷深房憶帝州賣花庭宇甯風流
窗紗破曉斜開扇
簾繡籠陰半上鉤少日喜拈春在手
暮年羞戴雪盈頭
泉南寺裏蕭蕭雨婉婉一聲無限愁

詩家鼎鑪

劉過

過字改之號龍洲道人吉州太和人嘗伏闕上

書請光宗過宮復以書抵時宰陳恢復方畧不
報放浪湖海間有龍洲集

多景樓

開禧乙丑作

金焦兩山相對起不盡中流大江水一樓坐斷天中央
收拾淮南數千里西風把酒門來游木葉漸脫人間秋
闕河景物異南北神京不見雙淚流君不見王勃詞華
能蓋世當時未遇庸人耳翩然落拓豫章游滕王閣中
悲帝子又不見李白才思真天人時人不省為謫仙一

朝放跡金陵去鳳凰臺上望長安我今四海游將徧東
歷蘓杭西漢沔第一江山最上頭天地無人獨登覽樓
高意遠愁緒多樓乎樓乎奈爾何安得李白與王勃名
與此樓長突兀

題謝耕道一犁春雨圖

阿耘無田食破硯養親日糴供朝飯凝塵壁上挂瓶罍
寒日窗前照藜莧汝父訓汝汝當知有田無田未可期
有田不耕汝嬾病無田說田真畫餅畫田之外更畫牛

捕風捉影何時休
頭上安頭又詩軸
全家不應猶食粥

寄湖州趙侍郎

桑柘村村烟樹濃
新秧刺水麥梳風
舟行苕霅雙溪上
人在蘇杭兩郡中
鼓角麗聲喧旦暮
旌旗小隊間青紅
主人夙有神仙骨
合住水晶天上宮

以上龍洲集

賦羊腰腎羹

拔毫已付管城子
爛胃曾封關內侯
死後不知身外物
也隨樽俎伴風流

挽張魏公

背水未成韓信陣，明星已隕武侯軍。
平生一點不平氣，化作祝融峯上雲。

山房隨筆：辛稼軒帥浙東時，晦菴南軒任倉憲，使劉改之欲見辛，不納。二公為之地，云某日公宴至後筵，便坐。君可來門者不納，但宣呼之，必可入。既而改之如所教，門下果誼詳辛，問故門者以告辛，怒甚。二公因言改之豪傑也，善賦詩，可試納之。改之至，長揖，公問能詩乎？曰能。時方進羊腰腎羹，辛命賦之。改之對甚寒，願乞卮酒，酒罷乞韻。時飲酒手顫，餘漉流于懷，因以流字為韻。即吟云：辛大，喜命共嘗此羹，終席而去。厚餽馬席散，南軒邀至公廨，置酒語之，曰：先君

魏公一生公忠為國功厄于命來挽者竟無一章得此意願君有意為發幽潛改之即賦一絕云云南軒為之墮淚今龍洲集中不見此二詩豈遺珠耶

朱晞顏

晞顏字子困新安人慶元中廣西漕使

慶元改元寒食日陪都運寺丞遊白龍洞時牡丹盛開小酌巖下夕陽西度並轡而歸

小溪漱碧響潺潺路入龍宮杳靄間佳節漫添新白髮故人賴有舊青山花朝幾共湘南醉萍迹何年嶺北還

歸路聯鑣紅日晚多慚龍卧白雲間

粵西詩載

白嶽寄懷

林間留我住多時似與烟霞夙有期
野老烹茶來獻客巖猿偷果去呼兒
靜思世上千年事不值山中一局碁
欲說行藏舒卷意洞天惟有白雲知

齊雲山志

鄒應龍

應龍字景初邵武軍太寧人慶元元年進士第

一理宗朝累官端明殿學士簽書樞密院事知

慶元府兼沿海制置使

遊寶蓋巖

夙有斯巖約今朝喜踐盟路從支澗入人在半空行六
月如霜候四時長雨聲願求容膝地著我過浮生

邵武府志

林士表

句

有書來進御無語不關農

進農書

陳伯震

句

修眉濃淡裏寸碧有無間

開簾出遠山

鄧伯秀

句

在我時舒卷從他自去留

釣簾宿鷺

朱縉

句

冰玉詞新吐塵埃氣不留

清文婉皇猷

陳瑄

句

似嫌秦閣小欲際楚天浮

風幔不依樓

吹劍錄省題詩雖場屋末技間有以此見長如
林士表諸人句皆主司所刮目

鷄棲以上皆南宋中葉人不可詳其次第姑附
于此

羅椿

椿字永年自號就齋廬陵人楊誠齋高弟

寄楊誠齋

慶元初誠齋與朱文公同召誠齋力辭

不愁風月祗憂時
髮為君王寸寸絲
司馬要為元祐起
西樞政坐壽皇知
苦辭君命驚凡子
清對梅花更與誰
夢繞師門三稽首
起敲冰硯訴相思

送永豐汪令

錦纜梅花浦江南
作縣歸新來薦鶚牘
驚動袞龍衣歲晚
情難別心親事卻
違恐君天上去扶
病出烟霏

句

露溼看花腳鶯啼欲曉山
春消千嶂雪清逼五湖秋

以上鶴林玉露

林亦之

亦之字學可號月漁福清人林光朝嘗講學莆
之紅泉及卒學者請亦之繼其席趙汝愚帥閩
嘗以亦之行業上于朝未幾卒學者稱網山先
生景定間謚文介贈廸功郎有集曰瑄按明王應山云縣志
贈官不言賜謚三山續志稱文介先生蓋私謚也
劉後村跋網山律詩高妙者絕類唐人

題林稚春菊花枕子歌

故人所說菊花枕似把冰丸月下飲秋水一雙明炯炯
數在青囊第一品狂風江上吹蒹葭往往得之嵇阮家
閉門讀書二十載眼睛損盡生空花建陽小作箸頭書
殘更燈火亂蟲魚石渠文字大如斗場屋歲月又不偶
卻來南山青草邊東西盡為菊花田手提長筐向山曲
一下收拾三百斛昨者昏迷才起來解把蠅頭小字讀
乃知妙物通羣仙一切藥裹應棄捐

丁亥九月十六夜偕李監倉宿龍臥山中聽雨看
月同時事也所謂魚與熊掌兼得之賦詩一篇以
紀其事

相喚此山來狂風吹我衣把酒桂花下山雲片段飛掩
門雨初滴開門月還上倚門看月明半山聞雨響人間
有佳景詩句頗發越何曾似今夕聽雨還看月

九日下水口

黃花時候苦思鄉急水還家一日強不道南風打頭上

客船搖櫓作重陽

寄表弟章由之為理曲堆屋廬

苦來為客竟何為
宅舍荒村誰與治
別墅雖無輞川畫
生涯堪入杜陵詩
身如燕子年年去
家似漁舟處處移
丹井西頭曲堆下
更煩歲晚定疎籬

輓光澤朱君

諱賡字師賢

諸老蕭蕭似卷塵
不堪再見素旌新
白頭縣尉吟笭浦
夜雨寒窗是舊人

以上網山集

曾從龍

從龍字君錫晉江人公亮四世從孫慶元五年
進士第一累官知樞密院事兼參知政事卒贈
少師

題衢州順溪館

紅照西沈暫解鞍偶然假館豈求安
新豐獨酌誰爲侶
坐對窗前竹一竿

娛書堂詩話曾參預從龍赴省時館于衢之順
溪題一絕云云識者已賸之矣是年竟至大魁

致身政府至今其館扁為狀元

魏了翁

了翁字華父號鶴山邛州蒲江人慶元五年進士理宗朝累官簽書樞密院事改資政殿學士福州安撫使卒贈太師謚文靖有鶴山集

題謝耕道一犁春雨圖

牀頭夜雨滴到明村南村北春水生老婦攜兒出門去
老翁赤腳呵牛耕一雙不借挂木杪半破夫須衝曉行

耕罷洗泥枕犢鼻卧看人間蠻觸爭

題上亭驛

紅錦綳盛河北賊紫金盞酌壽王妃弄成晚歲郎當曲

正是三郎快活時

原注俗所謂快活三郎者即明皇也

十二月九日雪融夜起達旦

遠鐘入枕報新晴衾鐵衣校夢不成起傍梅花讀周易
一窗明月四簷聲

梅磴詩話後二句寄興高遠人所傳誦

紫宸殿御筵即事

蛾眉班捲戴花回遙望君王玉色開
畫楯諸班謝茶酒
尻高首下一聲雷

以上鶴山集

題米南宮雲山圖

漠漠雲林小小山誰家茅屋隱松間
石橋雨過天台遠
采藥仙人去未還

式古堂畫考

盧祖臯

祖臯字申之又字次夔號蒲江永嘉人樓攻媿

甥慶元五年進士嘉定中為軍器少監權直學

士院

貴耳集蒲江貌字修整作小詞纖雅詩如舟中獨酌云山川似舊客懷老天地何言

春事深及玉堂有感松江別詩余領先生詞外之旨

黃玉林云蒲江乃趙紫芝翁靈舒諸賢之詩友其詞甚工字字可入律呂浙東西皆歌之

玉堂有感

兩山風雨故留寒
九陌香泥苦未乾
開到海棠春爛漫
擔頭時得數枝看

松江別詩

明月垂虹幾度秋
短篷長是繫人愁
暮烟疎雨分攜地
更上松江百尺樓

以上貴耳集

廟山道中

粉黃蛺蝶遶疎籬
山崦人家挂酒旗
細雨嫩寒衫袖薄
客中知是菊花時

梅磳詩話

醪醕

雪榦雲條一架春
酒中風度夢中聞
春風不是無顏色
過了梅花便是君

全芳備祖

讀書

細字燈前老不便
小齋新冷夜無眠
數聲牆竹蕭蕭雨
一縷銅爐淡淡煙

種橘

小擘枝頭滿袖香
纍纍秋實正宜霜
每來長是移時去
為爾風流似故鄉

以上僧居簡北礪集附

雨後得月小飲懷趙天樂

梅花此夜稀
嘉月弄光輝
不飲強呼酒
欲眠重啟扉
語

高驚鶴睡坐久見烏飛想見湖居友扁舟不月歸

東甌詩集

周師成

師成字宗聖號雉山長興人慶元五年進士

貴耳集宗聖少年秀麗讀書善記議論古今落
落可聽有詩高遠愛作選格仕不得志晚年若
有所遇如遊仙散聖之徒

梅

采采芳梅枝瑣碎白雲姿在山千花怨出山百鳥啼
操持思所寄轉趾述所思清披太始風寒應太虛月一日

拂人衣三歲香不歇

貴耳集

教陶孫

陶孫字器之長樂人慶元五年進士官泉州簽判有臞翁集

次韻馮孔武雪中簡聞人簿乞炭

君不見朱門煌煌多近臣
豹胎煮糜蠟為薪庭中盛設
滌寒戲炙手欲近還嗔人
誰知曝背茅簷下欲獻要是
山林真兒童抑搔皮肉輒日
輪過中方欠伸懸鵲結駟

兩相笑百年俱成一窖塵先生自是冷官樣要看入火
紅麒麟撚鬚自作詠雪句祕思早與相如親蒲團擁裘
結僧坐別有絺綌君南鄰願迴六龍照后土施與萬國
無邊春肩瓊鏤玉入肺腑拍手一笑吾未貧

奉寄旌德尉劉申之

諸劉兄弟賢一一無可選竹林銳頭郎風味吾小阮平
生天機深善閑得內健邇來卿何曹不辦折腰本稍傳
詩語東朝日照蘭畹伊余戰紛華心旆凡幾偃劃逢君

家語雋永初一驚識遺飽新得友勝悟夙損緬懷歌商
地蕭瑟松澗遠陰陰蕪菁花碧蜨相與晚是中著高士
物意自偃蹇向來白衣宰雲壑論補袞優游濟艱難如
以禹代鯀劉郎秀眉宇秋隼立高巘端能謝師匠萬卷
自鉏耨時須閱世諦一及城門鍵功名頭上簪日月風
中憶何時會吳下春動長洲苑

以上臞翁集

題三元樓壁

左手旋乾右轉坤如何羣小恣流言狼胡無地居姬旦

魚腹終天弔屈原一死固知公所欠孤忠幸有史長存
九泉若遇韓忠獻休道如今有末孫

四朝聞見錄慶元初韓侂胄既逐趙忠定太學諸生教陶孫賦詩於三元樓云云方書于樓之木壁壁已不復存陶孫知捕者至急更行酒者衣持煖酒具下捕者與交臂問教上舍在否對以若問太學秀才耶飯方酣陶孫亟亡命歸走閩後登乙丑第

西樓

祇有西樓日日登闌干東角每深凭一層已是愁無奈

想見仙人十二層

後村千家詩

蘇大璋

大璋字顯之古田人慶元五年進士官著作佐

郎出知吉州

鳳翀峯

在古田縣五花石

早起聯鑣上翠微
瞰虛歷級步嶽巖
昔聞華頂蓮生藕
今見南山菊滿籬
縱眼橫看天地闊
壯懷唯有鬼神知
安期引我丹霄路
十里雲烟特地披

福州

真德秀

德秀字希元浦城人慶元五年進士中詞科紹
定中拜參知政事進資政殿直學士提舉萬壽
觀卒諡文忠學者稱西山先生有集

挹仙亭

漢宮葦篴兒哢哢濟南梓柱陰扶疎富平家人正媮樂
安昌帝師工獻諛子真東南一尉耳黃綬淒涼百僚底
手持短䟽叩天閭義激丹衷淚橫背翩然一朝徑拂衣
愛君無路空依依人傳九江已仙去吳門再見是邪非

神仙茫茫那可測上帝從來賞忠直天上果有騶鸞人
合領羣真朝北極自從舉手謝世間千年白鶴何時還
玉簫聲斷杉檜冷祗餘丹竈留空山谷口之孫古膚使
亭斲青冥挹仙袂耿耿應懷貫日忠飄飄那羨凌雲氣
我來快讀華星篇清徹毛骨風冷然何當結屋最高頂
一榻容我分雲烟

會長沙十二縣宰作

從來守令與斯民都是同胞一體親豈有脂膏供爾祿

不思痛癢切吾身此邦祇以唐時古我輩當如漢吏循
今日湘潭一卮酒直須散作滿懷春

蓉塘詩話西山先生帥潭時作

皇后閣端午帖子

記得當年夢月符浴蘭節後恰旬餘欲知天錫無疆壽
認取仙螭領下書

瑤池十丈藕花香清賞尤便水殿涼聞說內家多樂事
前星親自捧霞觴

贈張童子

虎頭燕頤及鵞肩自笑都無一事全惟有數條爪樣骨

尚堪山澤作臞仙

如爪骨出人倫書

聞君早號張童子顧我初非韓退之可惜浪拋洙泗業

祇看風鑑學希夷

以上西山集

易 稜

稜字彥章潭州人第進士開禧官左司諫

浯溪中興頌

湘江東西直浯溪上有十丈中興碑誰鑿豐碑鎮山曲
溪邊美人美如玉想當歌頌大業時胸蟠星斗光陸離
蠶頭蠶尾更清勁凜凜襟懷冰雪瑩水部之文魯公書
兩翁寥寂千載餘後來更有黃太史健筆題詩起翁死
一派溪流徹底清溪邊鏡石堅而明我思古人不可見
水石猶作瓊瑰聲偶來真仙訪遺跡烟雨淒迷山路溼
野叟蒙頭看打碑君其問諸水邊石

浯溪集

葉秀發

秀發字茂叔金華人慶元進士知休寧縣

題龍吟寺

曉色愁征轡疎鐘忽斷林荒溪窮虎跡古寺到龍吟竹
影殘燈暗苔痕落葉深客懷無共說敲枕聽霜砧

黃山志

吳豐

豐官韶州經幹

贈胡彥忠

古羊人物舜風餘子姓傳來祇舊廬為愛一門能守義

相承五世不分居

廣東通志胡彥忠曲江人五世同居慶元己未
經幹吳豐假宿其家深加獎歎為言于臺閫列
上其事旌表其門

俞一成

成字元德東陽人著螢雪叢說慶元庚申自為
序

題釣臺

千古英風想子陵釣臺緣此幾人登誰知避諱更嚴氏

灘與州名總誤稱

瑩雪叢說嚴子陵本姓莊避顯宗諱遂稱嚴氏
若釣臺若七里灘亦皆以嚴命名無非循習之
訛而莫知其非也宣和間方臘寇江浙改睦州
為嚴州蓋本于此至如范蔚宗操東漢之史筆
初不究其姓氏之由遽曰嚴光而傳之無乃以
田千秋為車千秋乎

黃元夫

句

葦村風下鴉千點
麥隴天垂月一梳

瑩雪叢

王廉清

廉清字仲信汝陰人雪溪先生鉅長子問學該博與弟明清齊名著有京都歲時記廣古今同姓名錄補定水陸章句新乾曜真形圖

題玉霄亭

在台州子城上曾守鉅父建鉅父廉清之舅氏也

憶昔新亭敞玉霄使君髯舅意飄飄春風漱濫黃金琰
明月參差紫玉簫歌吹舊蹤空草木風流閑話屬漁樵
凭欄無限淒涼意寂寞寒江落暮潮

赤城志

王明清

明清字仲言汝陰人雪溪先生銍之次子慶元
間寓居嘉禾官泰州倅著有揮麈三錄玉照新
志投轄錄清林詩話

句

淒清寶鈿初分處愁絕清光欲破時

玉照新志紹興間乙卯張安國為右史明清與
仲信兄鄭舉善郭世禎李大正李泳多館于安
國家春日同游西湖至普安寺于窓戶間得玉
釵半股青蚨半文想是游人歡洽所分授偶遺
之者各賦詩以紀其事明清云云

葉 槭

槭慶元初監海鹽澈浦鎮稅

三里塘招梅

扶疎不耐繁華意足自然清絕壁閒幻出橫斜祇欠紗

窗明月

澈水志

孔夢斗

追詠鄒道鄉所植揚州學四柏

道鄉採芹暇手植四株柏相對有真味愛此歲寒格忠

言賈奇禍幾削諫臣跡柏亦助道鄉每號風雨夕柏死
公不死大名日皦白後人補種之存棠思召伯亭亭儼
相持撐雲空百尺是柏出雖晚風致猶古昔我來跂遺
芳清坐假一席徘徊意難捨猛把闌干柏寄語景行人
用意謹勿窄

惟楊志

倪 垕

垕淮南節度判官

追詠鄒道鄉所植揚州學四柏次前韻

斯文以道重所取不但柏借彼剛特姿昂然見標格歲
華閱如流蒼髯尚陳跡田畫亦奇士三歎子革夕人生
運窮達敢愛母頭白冷冷清風閒媿死幾侯伯誰歟繼
遺響高臥樓百尺袖攜萬斛珠一笑俯今昔知心古槐
樹交蔭上簾席大開多士鑪韶竿辨節拍所養貴所用
量廣滄海窄

惟揚志

薛寘

寘字持志明州昌國人慶元五年進士調衡陽


簿

洩潭瀑布

秋高水壯雪飛濤巖水招風怒竅號不是玉虹低澗飲

白龍拖雨下山腰

大德昌國州志



宋詩紀事卷五十八